



AMALAN bermaaf-maafan menjadi kelaziman umat Islam tanpa mengira bangsa.

Teruja sambut 1 Syawal kali pertama di Malaysia

SYAWAL merupakan detik kemenangan bagi umat Islam setelah sebulan berpuasa menahan diri daripada nafsu, lapar dan dahaga. Ia juga menjadi medium terbaik pertemuan seluruh kaum keluarga dan sahabat handai yang pulang ke kampung halaman setelah setahun berkelana di perantauan bagi menuntut ilmu atau bekerja. Namun, bukan semua yang bernasib baik untuk pulang ke kampung halaman atau rumah syah bonda pada pagi Aidilfitri atas sebab-sebab tersendiri.

Bagi Ma Qian Yuan, 21, atau nama Islamnya Isa, tahun ini dia bakal melalui pengalaman Aidilfitri yang berbeza kerana menyambut lebaran di Malaysia tanpa keluarga di sisi.

Pemuda yang dikenali dengan nama panggilan Sunshine itu merupakan pelajar persediaan bahasa Inggeris di Universiti Putra Malaysia, Serdang, Selangor dan telah berada di negara ini selama tujuh bulan.

"Ini kali pertama saya berpuasa di negara asing dan bersendirian tanpa keluarga."

"Bagi saya, hari pertama berpuasa sangat mencabar kerana cuaca di sini sangat panas. Namun, saya kuatkan semangat dan menganggapnya sebagai ujian bagi memenuhi tuntutan Rukun Islam ketiga," ujar anak kelahiran Linxia, Gansu, China itu.

Pemuda yang menggemari nasi goreng pataya itu memberitahu, faktor cuaca tidak merencatkan perjalanan ibadahnya kerana dia hanya berpuasa selama hampir 14 jam di sini berbanding lebih 16 jam di tanah air.

Berkunjung

"Walaupun kedengaran agak keanakan, tetapi pada pagi Syawal nanti saya bercadang untuk mengunjungi rumah jiran tetangga yang terletak berhampiran kawasan universiti termasuk rakan-rakan seagama dan senegara."

"Tahun ini saya ingin merasai kemeriahannya sambutan hari raya Aidilfitri dan kepelbagaian juadah lebaran enak di negara yang majoriti penduduknya beragama Islam," ujar anak sulung daripada tiga orang adik-beradik itu.



SUNSHINE (kiri), Ma Lin (tengah) dan Ahmed teruja untuk merasai pengalaman menyambut Syawal di Malaysia esok.

Turut menyumbang kepada populasi 1.8 peratus bersamaan 24.4 juta orang penduduk beragama Islam di negara republik China ialah rakan sekelas Sunshine, Ma Lin, 20.

"Pada mulanya saya merancang untuk melanjutkan pelajaran di England atau Australia. Namun, ayah mencadangkan Malaysia bagi memudahkannya melawat saya di sini kerana dia sering berulang-alik ke mari atas urusan perniagaan."

"Selama lima bulan berada di sini, saya benar-benar bersyukur dengan keputusan tersebut. Malaysia sangat kondusif untuk umat Islam dan keberkatannya sangat dirasai pada bulan Ramadan."

"Kini saya tidak sabar untuk merasai

kemeriahannya Syawal pula," ujar gadis manis yang berasal dari Lanzhou iaitu bandar utama di wilayah Gansu itu.

Kongsi Ma Lin, Ramadan tahun ini menjadi titik tolak penghijrahannya untuk menjadi seorang Muslim yang lebih baik. Dia yang mula berhijab sejak awal Ramadan baru-baru ini juga terpaksa bersahur dan solat Subuh berbekalkan cahaya lampu tandas sahaja kerana enggan mengganggu rakan senegara bukan Islam yang tinggal sebilik dengannya.

Kekeluargaan

Apakah menu tanah air yang paling dirindui untuk dinikmati pada hari raya? Ma Lin pantas memberitahu mi daging. Jelasnya, walaupun menu sama turut didapati di restoran Cina Muslim di sini, namun rasanya tidak setanding resipi asal.

Berbeza halnya dengan pemuda yang dilahirkan dan dibesarkan sebagai Muslim kelahiran Kurdistan, Iraq iaitu Ahmed Ismael Adil, 28.

Dia memilih Malaysia sebagai lokasi untuk melanjutkan pengajian Ijazah Sarjana Kejuruteraan Awam kerana keamanan negara ini membolehkannya menumpukan perhatian terhadap pelajaran dan beribadah.

"Saya perhatikan, masyarakat di Malaysia sangat menekankan elemen kekeluargaan terutama sewaktu mengimarahkan rumah Allah. Ibu dan ayah membawa anak-anak mereka untuk berbuka dan solat berjemaah bersama-sama di masjid."

"Selain itu, saya juga tertarik melihat pakaian mereka yang ceria berwarna-warni sewaktu mengunjungi Masjid Asy-Syakirin KLCC. Dengan bantuan rakan, saya kemudiannya membeli sepasang baju Melayu rona hitam lengkap berserta samping kerana merasakan ia warna yang selamat dan sesuai digayakan."

"Kini, saya tidak sabar untuk memakainya sewaktu berkunjung ke rumah terbuka Aidilfitri rakan-rakan," ujar bekas jurutera struktur reka bentuk bangunan yang fasih bertutur dalam enam bahasa iaitu Arab, Kurdi, Turki, Inggeris, Parsi dan Perancis.